



'Zar nemate povjerenja u mene, a ja sam povjerenik Onoga Koji je na nebesima?! Meni dolaze vijesti s neba i jutrom i s večeri!'

Prenosi se od Ebu Sei'da el-Hudrija, radijallahu 'anhu, da je kazivao: "Alija b. Ebi Talib, radijallahu anhu, poslao je iz Jemena Allahovom Poslaniku, sallallahu 'alejhi ve sellem, komadić zlata koji bijaše u koži štavljenoj lišćem mimoze, a još ne bijaše očišćen od prašine. On ga je podijelio među četvericom: Ujejom b. Bedrom, Akre'om b. Habisom, Zejdom Hajlom i, četvrtim, 'Alkamom ili Amirom b. Tufejlom. Na to jedan od njegovih drugova reče: 'Mi smo bili preči od ovih da nam se to podijeli!' To je doprlo do Vjerovjesnika, sallallahu 'alejhi ve sellem, pa je rekao: 'Zar nemate povjerenja u mene, a ja sam povjerenik Onoga Koji je na nebesima?! Meni dolaze vijesti s neba i jutrom i s večeri!' Tada ustade jedan čovjek udubljenih očiju i izraženih jagodičnih kostiju, visokog čela, guste brade, obrijane glave i zadignutog ogrtača i reče: 'Allahov Poslaniče, boj se Allaha!' 'Teško tebi', reče Poslanik, sallallahu 'alejhi ve sellem, 'zar ja nisam najpreči od svih ljudi na Zemlji da se boji Allaha?!' Čovjek se zatim udalji, a Halid b. Velid upita: 'Allahov Poslaniče, hoću li mu odrubiti glavu?' 'Nemoj, možda klanja!', reče Poslanik, sallallahu 'alejhi ve sellem, a Halid dodade: 'Koliko je klanjača koji jezicima izgovaraju ono što im nije u srcima?' 'Meni nije naređeno da zavirujem u ljudska srca, niti da otvaram njihove utrobe!', reče Allahov Poslanik, sallallahu 'alejhi ve sellem, gledajući za njim dok je odlazio, i dodade: 'Među potomcima ovog čovjeka pojavit će se oni koji će tečno učiti Allahovu Knjigu, ali ona neće prelaziti njihova grla. Izlazit će iz vjere kao što strijela prolazi kroz lovinu.' Mislim da je (još) rekao: 'Ako ih dočekam, pobit ću ih na način kao što je zatran Semud!'"

[صحيح] [متفق عليه]

Alija ibn Ebi Talib, radijallahu anhu, poslao je Poslaniku, sallallahu alejhi ve sellem, iz Jemena komad zlata umotan u kožu koja je štavljena i obrađena pomoću mimoze. Zlato još uvijek nije bilo očišćeno od prijanjajuće prašine. Poslanik, sallallahu alejhi ve sellem, podijelio je taj komad zlata četvorici ljudi: Ujejni b. Bedru El-Fezariju, Akre'u b. Habisu El-Hanzali, Zejdu El-Hajlu En-Nebhaniju i Alkami b. Ulasi El-Amiriju. Nakon toga jedan ashab reče: "Mi smo bili preči za ovo nego oni." To je doprlo do Poslanika, sallallahu alejhi ve sellem, pa je rekao: "Zar nemate povjerenja u mene, a ja sam povjerenik Onoga Koji je na nebesima?! Meni dolaze vijesti s neba i jutrom i s večeri!" Tada ustade neki čovjek čije su oči bile udubljene, s istaknutim gornjim dijelovima obraza, visokim čelom i gustom, ali ne dugom bradom, bio je obrijane glave i podignutog donjeg ogrtača, te reče: „O Allahov Poslaniče, boj se Allaha!“ Na to je Poslanik, sallallahu alejhi ve sellem, odgovorio: "Teško tebi! Zar nisam ja najpreči među

ljudima na zemlji da se bojim Allaha?!" Zatim se čovjek okrenuo i otišao. Halid ibn Velid, radijallahu anhu, reče: „O Allahov Poslaniče, zar da mu ne odsiječem glavu?“ Poslanik, sallallahu alejhi ve sellem, reče: "Ne, možda on klanja." A Halid reče: „Koliko samo onih koji klanjaju govore jezikom ono što nije u njihovim srcima.“ A Poslanik, sallallahu alejhi ve sellem, odgovori: „Nije mi naređeno da istražujem ono što je u srcima ljudi niti da im otvaram nutrinu. Meni je naređeno da postupam shodno onome što je vidljivo.“ Zatim je pogledao u njega dok je odlazio i rekao: „Iz loze ovog čovjeka, i njegovih drugova ili plemena, pojavit će se ljudi koji će biti vrsni učaci Allahove Knjige s lijepim glasom. Njihovi jezici će biti vlažni od čestog učenja, ali Kur'an neće prelaziti njihove grkljane i neće doći do njihovih srca kako bi ih očistio i popravio. Allah neće podići njihov status, niti će to od njih prihvatiti. Oni će izlaziti iz islama kao što strijela izlazi iz luka, brzo i lahko." I mislim da je još rekao: "Ako dočekam da se pojave i bore protiv muslimana, tako ću se žestoko boriti protiv njih i ubijati ih na način kako je ubijen Semud."

<https://sunnah.global/hadeeth/bs/show/8307>

النجاة الخيرية
ALNAJAT CHARITY

